

四庫全書

子部

欽定四庫全書

巢氏諸病源候總論卷三十五

隋 巢元方 撰

瘡病諸候

凡六十五論

頭面身體諸瘡候

夫內熱外虛爲風濕所乘則生瘡所以然者肺主氣候
於皮毛脾主肌肉氣虛則膚腠開爲風濕所乘內熱則
脾氣溫脾氣溫則肌肉生熱也濕熱相搏故頭面身體

皆生瘡其瘡初如皰頭更生汁熱盛者則變爲膿隨瘡
隨發

頭面身體諸久瘡候

諸久瘡者內熱外虛爲風濕所乘則頭面身體生瘡其
藏內熱實氣盛熱結肌肉其熱留滯不散故瘡經久不
瘥

諸惡瘡候

諸瘡生身體皆是體虛受風熱風熱與血氣相搏故發

瘡若風熱挾濕毒之氣者則瘡痒痛焮腫而瘡多汁身體壯熱謂之惡瘡也

養生方云銅器蓋食汁入食發惡瘡內疽也

又云醉而交接或致惡瘡 又云飲酒熱未解以冷水

洗面令惡瘡輕者敷炮 又云五月五日取棗葉三

升并華水搗取汁浴永不生惡瘡 又云并華水和粉

洗足不病惡瘡其湯熨針石別有正方補養宣導今附

於後

養生方導引法云龍行氣叩頭下視不息十二通愈風
疥惡瘡熱不能入

又云五月一日八月二日九月九日十月七日十一月
四日十二月十三日沐浴除惡瘡

久惡瘡候

夫體虛受風熱濕毒之氣則生瘡痒痛焮腫多汁壯熱
謂之惡瘡而濕毒氣盛體外虛內熱其瘡漸增經久不
瘥爲久惡瘡

癰瘡候

癰瘡者由膚腠虛風濕之氣折於血氣結聚所生多著手足間適相對如新生茱萸子痛痒抓搔成瘡黃汁出浸淫生長折裂時瘡時劇變化生蟲故名癰瘡

燥癰瘡候

膚腠虛風濕搏於血氣則生癰瘡若濕氣少風氣多者其癰則乾燥但痒搔之白屑出乾枯拆痛此蟲毒氣淺在皮膚故名燥癰瘡也

濕癰瘡候

膚腠虛風濕搏於血氣生癰瘡若風氣少濕氣多其瘡
痛痒搔之汁出常濡濕者此蟲毒氣深在於肌肉內故
也

久癰瘡候

癰瘡積久不瘥者由膚腠虛則風濕之氣停滯蟲在肌
肉之間則生長常痒痛故經久不瘥

癬候

癬病之候皮肉隱胗如錢文漸漸增長或圓或斜痛痒有匡郭裏生蟲搔之有汁此肉風濕邪氣客於腠理復值寒濕與血氣相搏則血氣否澀發此疾

按九蟲論云蛻蟲在人腸內變化多端發動亦能爲癬而癬內實有蟲也

養生方云夏勿露面卧露下墮面皮厚及喜成癬

乾癬候

乾癬但有匡郭皮枯索痒搔之白屑出是也皆是風濕

邪氣客於腠理復值寒濕與血氣相搏所生若其風毒氣多濕氣少故風沈入深故無汁爲乾癬也其中亦生

蟲

濕癬候

濕癬者亦有匡郭如蟲行浸淫赤濕痒搔之多汁成瘡是其風毒氣淺濕多風少故爲濕癬也其裏亦生蟲

風癬候

風癬是惡風冷氣客於皮折於血氣所生亦作圓文匡

郭但抓搔頑痺不知痛痒其裏亦有蟲

白癬候

白癬之狀白色磴磴然而痒此亦是腠理虛受風風與氣并血澀而不能榮肌肉故也

牛癬候

俗云以盆器盛水飲牛用其餘水洗手面即生癬名牛癬其狀皮厚抓之鞣強而痒是也其裏亦生蟲

圓癬候

圓癬之狀作圓文隱起四畔赤亦痒痛是也其裏亦生蟲

狗癬候

俗云狗舐之水用洗手面即生癬其狀微白點綴相連亦微痒是也其裏亦生蟲

雀眼癬候

雀眼癬亦是風濕所生其文亦是雀眼故謂之雀眼癬搔之亦痒中亦生蟲

刀癬候

俗云以磨刀水用洗手面而生癬名爲刀癬其形無匡郭縱橫無定是也中亦生蟲

久癬候

久癬是諸癬有蟲而經久不瘥者也癬病之狀皮肉隱胗如錢文漸漸增長或圓或斜痒痛有匡郭搔之有汁又有乾癬枯索痒搔之白屑出又有濕癬如蟲行浸淫赤濕痒搔之有汁又有風癬搔之頑痺不知痛痒又有

牛癬因飲牛餘水得之其狀皮厚抓之鞣強又有圓癬作圓文隱起四面赤又有狗癬因以狗舐餘水洗手面得之其狀微白點綴相連亦微痒又有雀眼癬作細文似雀眼搔之亦痒痛又有刀癬因以磨刀水洗手面得之其狀無匡郭縱邪無定如此之癬初得或因風濕客於肌膚折於血氣所生或因用牛狗所飲餘水洗手面得之至其病成皆有蟲侵食轉深連滯不瘥故成久癬

疥候

疥者有數種有大疥有馬疥有水疥有乾疥有濕疥多
生手足乃至遍體大疥者作瘡有膿汁焮赤痒痛是也
馬疥者皮內隱鱗起作根塹搔之不知痛此二者則重
水疥者瘡癰如小癰摘破有水出此一種小輕乾疥者
但痒搔之皮起作乾痂濕疥者小瘡皮薄常有汁出並
皆有蟲人往往以針頭挑得狀如水內痛蟲此悉由皮
膚受風邪熱氣所致也

按九蟲論云蟯蟲多所變化多端或作癰疥痔瘻無所

不爲其湯熨針石別有正方補養宣導今附於後

養生方導引法云龍行氣叩頭下視不息十二通愈風
疥惡瘡熱不能入

乾疥候

乾疥但痒搔之皮起作乾痂此風熱氣深在肌肉間故
也

濕疥候

濕疥起小瘡皮薄常有水汁出此風熱氣淺在皮膚間

故也

熱瘡候

缺

查疽之狀隱胗赤起如今查榘子形是也亦是風邪客於皮膚血氣之所變生也其瘡亦有蟲亦痒痛時焮腫汁出

頑疽候

此由風濕客於皮膚血氣變隱胗生瘡痒而不痛故名

頑疽

瘰癧候

瘰癧是諸雜瘡帶風濕苦痒數以手抓搔瘰癧觸便侵食
濶久不瘥乃變生蟲故名瘰癧

月食瘡候

月食瘡生於兩耳及鼻面間并下部諸孔竅側侵食乃
至筋骨月初則瘡盛月末則瘡衰以其隨月生因名之
爲月食瘡也又小兒耳下生瘡亦名月食世云小兒見
月以手指指之則令病此瘡也其生諸孔竅有蟲久不

瘡則變成癰也

天上病候

天上病者人神采昏塞身體沉重下體生瘡上食五臟其者至死世人隱避其名故云天上病也此是臟腑虛腸胃之間蟲動侵食人五臟故也

甜瘡候

甜瘡生面上不痒不痛常有肥汁出汁所留處隨即成瘡亦生身上小兒多患之亦是風濕搏於血氣所生以

其不痒不痛故名甜瘡

浸淫瘡候

浸淫瘡是心家有風熱發於肌膚初生甚小先痒後痛而成瘡汁出侵潰肌肉浸淫漸濶乃徧體其瘡若從口出流散四肢則輕若從四肢生然後入口者則重以其漸漸增長因名浸淫也

反花瘡候

反花瘡者由風毒相搏所爲初生如飯粒其頭破則血

出便生惡肉漸大有根膿汁出肉反散如花狀因名反
花瘡凡諸惡瘡久不瘥者亦惡肉反出如反花形

瘡建候

人身上患諸瘡熱氣盛者腫焮痛附畔別結聚狀如瘰
癧者名爲瘡建亦名瘡根也

王爛瘡候

王音旺

王爛瘡者由臟腑實熱皮膚虛而受風濕與熱相搏故
初起作瘰癧漿漸漸王爛汁流浸潰爛故名王爛也亦名

王灼瘡其初作癰漿如湯火所灼也又名洪燭瘡初生如沸湯洒作癰漿赤爛如火燭故名洪燭也

白頭瘡候

白頭瘡者由體虛帶風熱遍身生瘡瘡似大疥痒漸白頭而有膿四邊赤疼痛是也

無名瘡候

此瘡非癰非疽非癬非疥狀如惡瘡或癢或劇人不能名無名瘡也此亦是風熱搏於血氣所生也

猪灰瘡候

猪灰瘡者坐處生瘡赤黑有竅深如大豆許四邊青中央圻作凹陷而不甚痛狀如猪灰因以爲名此亦是風熱搏於血氣所生也

不痛瘡候

諸瘡久不瘥觸風冷有惡肉則搔針灸不覺痛因以不痛爲名

雁瘡候

雁瘡者其狀生於體上如濕癬瘰瘍多著四支乃遍身其瘡大而熱疼痛得此瘡者常在春秋二月八月雁來時則發雁去時則瘥故以爲名亦雁過荆漢之域多有此病

蜂巢瘡候

其瘡如疽癰之類有小孔象於蜂巢因以爲名此亦風濕搏於血氣之所生也

斷咽瘡候

此瘡繞頸而生皮傷赤若匝頸則害人此亦是風濕搏於血氣之所生也

毒瘡候

此由風氣相搏變成熱毒而生瘡於指節或指頭初似疥甚痒經宿乃紫黑也

甄毒瘡候

俗云人有用甄花上露水以洗手遇毒即作瘡因以名之

晦瘡候

其瘡生皆兩兩相對頭戴白膿俗云人有誤小便放竈處即生此瘡小兒多患也

集瘡候

此瘡十數箇集生一處因以爲名亦是皮膚偏有虛處風濕搏於血氣變生

屋食瘡候

缺

斷耳瘡候

斷耳瘡生於耳邊久不瘥耳乃取斷此亦月食之類但不隨月生長爲異此瘡亦是風濕搏血氣所生以其斷耳因以爲名也

新婦瘡候

此瘡狀繞腰生如蠅虻屎但不痛爲異耳此瘡亦是風濕搏血氣所生而世人呼之爲新婦瘡也

土風瘡候

土風瘡狀如風疹而頭破乍發乍瘥此因肌腠虛疎風

塵入於皮膚故也俗呼之爲土風瘡也

逸風瘡候

逸風瘡生則遍體狀如癬疥而痒此由風氣散逸於皮膚因名逸風瘡也

飢帶瘡候

飢帶瘡者繞腰生此亦風濕搏血氣所生狀如飢帶因以爲名又云此瘡繞腰而則殺人

兔齧瘡候

凡疽發於脛名曰兔齧瘡一名血實瘡又隨月生死蓋月食之類非脛瘡也尋此瘡亦風濕搏於血氣血氣實熱所生故一名血實又名兔齧者亦當以其形狀似於兔齧因以爲名

血瘡候

血瘡者云諸患風濕搏血氣而生瘡其熱氣發逸瘡但出血者名爲血瘡也

瘡中風寒水候

凡諸瘡生之初因風濕搏血氣發於皮膚故生也若久不瘥多中風冷水氣若中風則噤瘕中冷則難瘥中水則腫也

露敗瘡候

凡患諸瘡及惡瘡初雖因風濕搏血氣蘊結生蒸發皮肉成瘡若觸水露氣動經十數年不瘥其瘡瘀黑作痂如被霜皴皮瘡內肉似斷故名露敗瘡也

瘡惡肉候

諸瘡及癰疽皆是風濕搏血氣血氣蘊結生熱而發肌肉成瘡久不瘥者多生惡肉四邊突起而好肉不生此由毒熱未盡經絡尚壅血氣不到故也

瘡瘥復發候

諸惡瘡皆因風濕毒所生也當時雖瘥其風毒氣猶在經絡者後小勞熱或食毒物則復更發

漆瘡候

漆有毒人有稟性畏漆但見漆便中其毒喜面痒然後

胃臂胫膕皆悉瘙痒面爲起腫繞眼微赤諸所痒處以手搔之隨手輦展起赤瘡癰瘡消已生細粟瘡甚微有中毒輕者證候如此其有重者遍身作瘡小者如麻豆大者如棗杏膿焮疼痛摘破小定有小瘡隨次更生若火燒漆其毒氣則厲著人急重亦有性自耐者終日燒煮竟不爲害也

凍爛腫瘡候

嚴冬之月觸冒風雪寒毒之氣傷於肌膚血氣壅滯因

即瘰癧凍皴赤疼腫便成凍瘡乃至皮肉爛潰重者支節
墮落

夏日沸爛瘡候

盛夏之月人膚腠開易傷風熱風熱毒氣搏於皮膚則
生沸瘡其狀如湯之沸輕者市市如粟粒重者熱汗漬
漬成瘡因以爲名世呼爲沸子也

傷瘡病諸候

凡四論

湯火瘡候

凡被湯火燒者初慎勿以冷物及井下泥尿泥及蜜淋搨之其熱氣得冷即却深搏至骨爛人筋也所以人中湯火後喜攣縮者良由此也

灸瘡急腫痛候


夫灸瘡膿潰已後更焮腫急痛者此中風冷故也

灸瘡久不瘥候

夫灸之法中病則止病已則瘡瘥若病勢未除或中風冷故久不瘥也

針灸瘡發洪候

夫針灸皆是節穴俞募之處若病甚則風氣衝擊於瘡
凡血氣相隨而行故風乘於氣而動於血血從灸瘡處
出氣盛則血不止名爲發洪



巢氏諸病源候總論卷三十五

欽定四庫全書

子部

巢氏諸病源候總論卷三十六至

三八

詳校官太醫院愚糧臣孔毓秀

編修臣倉聖脈覆勘

總校官庶吉士臣何思鈞

校對官中書臣吳俊

謄錄舉人臣楊兆豐

欽定四庫全書

巢氏諸病源候總論卷三十六

隋 巢元方 撰

獸毒病諸候

凡四論

馬齒踏人候

凡人被馬齒踏及馬骨所傷刺并馬韁韉勒所傷皆為
毒瘡若腫痛致煩悶是毒入腹亦斃人

馬毒入瘡候

凡人先有瘡而乘馬汗并馬毛垢及馬屎尿及坐馬皮
韉並能有毒毒氣入瘡致焮腫疼痛煩熱毒入腹亦斃
人

獬狗咬候

凡獬狗咬人七日輒一發過三七日不發則無苦也要
過百日方大免耳當終身禁食犬肉及蠶蛹食此發則
死不可救矣瘡未愈之間禁食生魚猪雞臙過一年禁
之乃佳但於飲下飯蒸魚及於肥器中便發若人曾食

落葵得犬啮者自難治若瘡瘻十數年後食落葵便發
狗啮重發候

凡被狗啮瘡忌食落葵及狗肉云雖瘻經一二年但食
此者必重發重發者與初被啮不殊其獠狗啮瘡重發
則令人狂亂如獠狗之狀

蛇毒病諸候

凡五論

蛇螫候

凡中蛇不應言蛇皆言蟲及云地索勿正言其名也惡

蛇之類甚多而毒有瘡劇時四月五月中青蛙三角蒼
虺白頸大蜴六月七月中竹猺艾蜥黑甲赤目黃口反
鈎白蛙三角此皆蛇毒之猛者中人不即治多死又有
赤連黃領之類復有六七種而方不盡記其名水中黑
色者名公螭山中一種亦相似不常聞螫人又有鈎蛇
尾如鈎能倒牽人獸入水沒而食之又南方有啣蛇人
忽傷之不死終身伺覓其主不置雖百人衆中亦直來
取之惟遠去出百里乃免耳又有拖蛇長七八尺如船

拖狀毒人必死即削取船舵煮汁漬之便瘥但蛇例雖多今皆以青條矯尾白頸艾蝮其毒尤劇大者中人若不即治一日間舉體洪腫皮肉坼爛中者尚可待二三日也凡被蛇螫第一禁第二藥無此二者有全齋雄黃麝香可預辦故山居者宜令知禁法也又惡蛇螫者人即頭解散言此蛇名黑帝其瘡冷如凍凌此大毒惡不治一日即死若頭不散此蛇名赤帝其毒小輕瘡上冷不治故得七日死凡蛇瘡未愈禁熟食熟食便發治之

依初被螫法也

蝮蛇螫候

凡蝮中人不治一日死若不早治之縱不死者多殘斷
人手足蝮蛇形乃長頭褊口尖頸斑身亦艾斑色青黑
人犯之頸腹帖著地者是也江東諸山甚多其毒最烈
草行不可不慎又有一種狀如蝮而短有四脚能跳來
嚙人名曰千歲蝮中人必死然其嚙人竟即跳上樹作
聲云斫木者但營棺具不可救若云擣菽者猶可治吳

音呼藥為菽故也

虺螫候

虺形短而褊身亦赤黑色山草自不甚多每六七月中午時出路上喜入車轢中令車轢腹破而子出人侵晨及冒昏行者每傾意看之其螫人亦往往有死者

青蛙蛇螫候

青蛙蛇者正綠色喜緣樹及竹上自掛與竹樹色一種人看不覺若入林中行有落人項背上者然自不傷齧

人齧人

而蛇無正形極大者不過四五寸世人皆

呼為青條蛇言其與枝條同色乍看難覺其尾二三寸色黑者名螭尾毒最猛烈中人立死

蝮毒候

此是諸毒蛇夏日毒盛不泄皆齧草木及吐毒著草木上人誤犯著此者其毒如被蛇螫不殊但瘡腫上有物如蟲蛇眼狀以此別之名為蝮毒

雜毒病諸候

凡十四論

蜂螫候

蜂類甚多而方家不具顯其名惟地中大土蜂最有毒一螫中人便即倒悶舉體洪腫諸藥治之皆不能卒止舊方都無其法雖然不肯殺人有禁術封唾亦微効又有瓠瓢蜂抑亦其次餘者猶瘥

蠍螫候

此蟲五月六月毒最盛云有八節九節者彌甚螫人毒勢流行多至牽引四支皆痛過一周時始定

蠱螫候

陶隱居云蠱蟲方家亦不能的辯正云是蠅蚘子或云
是小烏蟲尾有兩歧者然皆恐非也疑即是蠍蠍尾歧
而曲上故周詩云彼都人士拳髮如蠆

蜈蚣螫候

此則百足蟲也雖復有毒而不甚螫人人誤觸之者故
時有中其毒

蜈蚣著人候

江東及嶺南無處不有蜺蝥蜺蝥乃是兩種物蜺者在草裏名為山蜺在水裏名馬蜺皆長四五寸許黑色身滑人行涉山水即著人肉不甚痛而癢兩頭皆能啣人血血滿腹便自脫地無甚毒害蝥者無不背作文理粗澀多著龜螺殼上若著人肉即於肉裏生子乃至十數枚經日便腫癢隱軫起久久亦成瘡癰

石蛭螫人候

山中草木及路上石上石蛭著人則穿齧肌皮行人肉

中浸淫起瘡灸斷其道則愈凡行山草之中常以膏和藥塗足脛則蛭不得著人

蠶齧候

蠶既是人養之物性非毒害之蟲然時有齧人者乃令人增寒壯熱經時不瘥亦有因此而致斃斯乃一時之怪異救解之方愈

甘鼠齧候

此即鼯鼠也形小而口大多食傷牛馬不甚痛云其口

甜故名甘鼠時有齧人者

諸魚傷人候

魚類甚多其鮪魴鰩鮓之徒鬻骨芒刺有毒傷人則腫痛

惡蠅齧候

蠅房中切

惡蠅一名滿大如毒蟬似蝗無尾前有兩角觸後則傍後觸前則却行生於樹皮內及屋壁間又喜在紙書內圓似榆莢其色赤黑背橫理二月生十月蟄螫人惟以

三時五月六月七月元毒初如皰狀中央紫黑大如粟粒四旁微腫焮焮色赤或有青色者癢喜搔之若飲酒房室近不過八九日遠不過十餘日爛潰為膿汁亦殺人

狐尿刺候

云是野狐尿棘刺頭有人犯之者則多中於人手指足指腫痛焮熱有端居不出而著此毒者則不必是狐尿刺也蓋惡毒氣耳故方亦云惡刺毒者也

蚝蟲螫候

此則樹上蚝蟲耳故名蚝毛此毒以其毛刺能螫人蓋輕不至深斃然亦甚痛螫處作軫起者是也

蠅螻尿候

蠅螻蟲云能尿人影即令所尿之處慘痛如芒刺亦如蚝蟲所螫然後起細瘡瘰作聚如茱萸子狀其瘡瘰徧赤中央有白膿如粟粒亦令人皮肉拘急惡寒壯熱極者連起多著腰脇及胃若繞腰匝徧者重也

入井塚墓毒氣候

凡古井塚及深坑窞中多有毒氣不可輒入五月六月間最甚以其鬱氣盛故也若事輒必須入者先下雞鴨毛試之若毛旋轉不下即是有毒使不可入

金瘡病諸候

凡二十三論

金瘡初傷候

夫被金刃所傷其瘡多有變動若按瘡邊乾急肌肉不生青黃汁出瘡邊寒清肉消臭敗前出赤血後出黑血

如熟爛骨及血出不止白汁隨出如是者多凶若中絡
脈髀內陰股天聰眉角橫斷腓腸乳上及與鳩尾攢毛
小腹尿從瘡出氣如賁豚及腦出諸瘡如是者多凶少
愈診金瘡血出太多其脈虛細者生數實大者死小者
生浮大者死所傷在陽處者去血四五斗脈微緩而遲
者生急疾者死

金瘡血不止候

金瘡血出不斷其脈大而止者三七日死金瘡血出不

可止前赤後黑或黃或白肌肉腐臭寒冷踰急者其瘡難愈亦死

金瘡內漏候

凡金瘡通內血多內漏若腹脹滿兩脇脹不能食者死瘀血在內腹脹脈牢大者生沉細者死

毒箭所傷候

夫被弓弩所傷若箭鏃有茵藥入人皮膚令人短氣須臾命絕口噤脣乾血為斷絕腹滿不言其人如醉未死

之間為不可治若榮衛青瘀血應時出瘡邊溫熱口開
能言其人乃活毒箭有三種嶺南夷俚用焦銅作箭鏃
次嶺北諸處以蛇蟲毒熬物汁著管中漬箭鏃此二種
纔傷皮便洪腫沸爛而死惟射豬犬雖困得活以其噉
糞故也人若中之便即食糞或飲糞汁并塗瘡即愈不
爾須臾不可復救芮箭著寬處者雖困漸治不至死若
近胃腸便宜速治小緩毒入內則不可救

金瘡腸出候

此謂為矛箭所傷若中於腹則氣激氣激則腸隨瘡孔出也

金瘡腸斷候

夫金瘡腸斷者視病深淺各有死生腸一頭見者不可連也若腹痛短氣不得飲食者大腸一日半死小腸三日死腸兩頭見者可連續之先以針縷如法連續斷腸便取雞血塗其際勿令氣泄即椎內之腸但出不斷者當作大麥粥取其汁持洗腸以水漬內之當作研米粥

飲之二十餘日稍作強糜食之百日後乃可進飲耳飽
食者令人腸痛決漏常服錢屑散若腸腹_音冊出
有死者有生者但視病取之各有吉凶冊出如手其下
牢核煩滿短氣發作有時不過三日必死冊下不留安
足不煩喘息如故但瘡痛者當以生絲縷繫之其血脈
當令一宿乃可截之勿開其口膏稍導之

金瘡筋急相引痛不得屈伸候

夫金瘡愈已後肌肉充滿不得屈伸者此由傷絕經筋

榮衛不得循行也其瘡雖愈筋急不得屈伸也

金瘡傷筋斷骨候

夫金瘡始傷之時半傷其筋榮衛不通其瘡雖愈合後仍令痺不仁也若被瘡截斷諸解身軀肘中及腕膝髀若踝際亦可連續須急及熱其血氣未寒碎骨便更縫連其愈後直不屈伸若碎骨不去令人痛煩膿血不絕不絕者不得安諸中傷人神十死一生

箭鏃金刃入肉及骨不出候

箭鏃金刃中骨骨破碎者須令箭鏃出仍應除碎骨盡
乃傳藥不爾瘡永不合縱合常疼痛若更犯觸損傷便
驚血沸漬有死者

金瘡中風瘕候

夫金瘡瘕者此由血脈虛竭飲食未復未滿月日榮衛
傷穿風氣得入五臟受寒則瘕其狀口急背直搖頭馬
鳴腰為反折須臾大發氣息如絕汗出如雨不及時救
者皆死凡金瘡卒無汗者中風也邊自出黃汁者中水

也並欲作瘰癧急治之又痛不在瘡處者傷經絡亦死

金瘡驚腫候

夫金瘡愈閉後勿驚腫動起糜沸跳手大者如孟小者如盃名為盜血此由肌未定裏不滿因作勞起早故令盜血涌出在人皮中不肯自消亦不成膿反勞核又有加血加血者盜血之滿也其血凝深不可妄破破之者盜血前出不可禁止加血追之出即滿瘡中便留止令人短氣須臾命絕

金瘡因交接血驚出候

夫金瘡多傷經絡去血損氣其瘡未瘥則血氣尚虛若因而房室致情意感動陰陽發泄驚觸於瘡故血汁重出

金瘡驚悸候

金瘡失血多者必驚悸以其損於心故也心主血血虛則心守不安心守不安則喜驚悸者心動也

金瘡煩候

金瘡損傷血氣經絡空虛則生熱熱則煩痛不安也

金瘡欬候

金瘡傷血損氣氣者肺之所主風邪中於肺故欬也

金瘡渴候

夫金瘡失血則經絡空竭津液不足腎臟虛燥故渴也

金瘡蟲出候

夫金瘡久不瘥及裹縛不如法瘡內敗壞故生蟲也

金瘡著風候

夫金瘡乾無汁亦不大腫者中風也寒氣得大深者至藏便發作瘻多凶少愈中水者則腫多汁或成膿

金瘡著風腫候

此由瘡著於風風氣相搏故腫也

金瘡成癰腫候

夫金瘡冬月之時衣厚絮溫故裏欲薄夏月之時衣單日涼故裏欲厚重寒傷榮重熱傷衛筋勞結急肉勞驚腫骨勞折沸難可屈伸血脈勞者變化作膿榮衛不通

留結成癰凡始縫其瘡各有縱橫雞舌隔角橫不相當
縫亦有法當次陰陽上下逆順急緩相望陽者附陰陰
者附陽腠理皮脈復令復常但亦不曉略作一行陰陽
閉塞不必作膿榮衛不通留結為癰晝夜不卧語言不
同碎骨不去其人必凶雞舌隔角房不相當頭毛解脫
忘失故常瘡不再縫膏不再漿

金瘡中風水候

夫金瘡裹縛不密為風水氣所中則疼痛不止而腫痛

內生青黃汁

金瘡下血虛竭候

金刃中於經絡者下血必多腑臟空虛津液竭少無血氣榮養故須補之

金瘡久不瘥候

缺

承右脇以鼻內氣自極七息除瘀血結氣

又云鼻內口閉有極七息除兩脇下積血氣

又雲端坐生腰舉左手右手承右脇鼻內氣七息除瘀

血

又云端坐右手持腰鼻內氣七息左右戾頭各三十止
除體瘀血項頸痛

又云雙手搦腰手指相對向盡勢前後振搖二七又將
手大指向後極勢振搖二七不移手上下對與氣下盡
勢來去三七去雲門腰掖血氣閉塞

壓逆墜墮內損候

此為人卒被重物壓逆或從高墜下致吐下血此傷五

內故也

腕傷初繫縛候

夫腕傷重者為斷皮肉骨髓傷筋脉皆是卒然致損故血氣隔絕不能同榮所以須善繫縛按摩導引令其血氣復

被損久瘀血候

此為被損傷仍為風冷搏故令血瘀結在內久不瘥也

腕折中風瘕候

夫腕折傷皮肉作瘡者慎不可當風及自扇若風入瘡內犯諸經絡所致痙瘓者脊背強直口噤不能言也

腕折中風腫候

此為風入瘡內而不入經絡其搏於氣故但腫也

刺傷中風水候

此為竹木所刺傷其瘡中風水者則腫痛乃至成膿

巢氏諸病源候總論卷三十六

欽定四庫全書

巢氏諸病源候總論卷三十七

隋 巢元方 撰

婦人雜病諸候一 凡三十二論

風虛勞冷候

風虛勞冷者是人體虛勞而受於冷也夫人將攝順理則血氣調和風寒暑溼不能為害若勞傷血氣便致虛損則風冷乘虛而干之或客於經絡或入於腹內其經

絡得風冷則氣血冷澀不能自溫於肌膚也腹內得風冷則脾胃弱不消飲食也隨其所傷而變成病若大腸虛者則變下利若風冷入於子臟則令臟冷致使無兒若搏於血則血澀壅亦令經水不利斷絕不通

風邪驚悸候

風邪驚悸者是為乘於心故也心藏神為諸臟之主若血氣調和則心神安定若虛損則心神虛弱致風邪乘虛干之故驚而悸動不定也其驚悸不止則變恍惚而

憂懼

虛汗候

人以水穀之精化為血氣津液津液行於腠理若勞傷損動陽氣外虛腠理開血氣衰弱故津液洩越冷多汗也其虛汗不止則變短氣柴瘦而羸瘠也亦令血脈減損經水否塞甚者閉斷不通也

中風候

中風者虛風中於人也風是四時八方之氣常以冬至

之日候其八方之風從其鄉來者生長養萬物若不從其鄉來名為虛風則害萬物人體虛者則中之當時雖不即發停在肌膚後或重傷於風前後重沓因體虛則發人腑臟俞皆在背中風多從俞入隨所中之俞而發病若心中風但得偃卧不得傾側汗出若脣赤汗流者可治急灸心俞百壯若脣或青或白或黃或黑此是心壞為水面目亭而時悚動皆不可復治五六日而死若肝中風踞坐不得低頭若遶兩目連額上色微有青者

脣青而面黃可治急灸肝俞百壯若大青黑面一黃一
白者是肝已傷不可復治數日而死若脾中風踞而腹
滿身通黃吐鹹水汗出者可治急灸脾俞百壯若手足
青者不可復治腎中風踞而腰痛視脇左右未有黃色
如餅糥大者可治急灸腎俞百壯若齒黃赤髻髮直面
土色不可復治肺中風側卧而脅滿短氣冒悶汗出視
目下鼻上下兩邊下行至口色白可治急灸肺俞百壯
若色黃為肺已傷化為血而不可復治其人當妄掇空

自拈衣此亦數日而死

中風口噤候

中風口噤是體虛受風風入頷頰夾口之筋也手三陽之筋結入於頷頰足陽明之筋上夾於口而風挾冷乘虛而入其筋則筋攣故引牙關急而口噤

角弓反張候

角弓反張是體虛受風風入諸陽之經也人陰陽經絡周環於身風邪乘虛入諸陽之經則腰背反折攣急如

角弓之狀

偏風口喎候

偏風口喎是體虛受風風入於夾口之筋也足陽明之筋上夾於口其筋偏虛而風因乘之使其經筋偏急不調故令口喎僻也

賊風偏枯候

賊風偏枯是體偏受風風客於半身也人有勞傷血氣半身偏虛者風乘虛入客為偏風也其風邪入深真氣

去邪氣生則為偏枯此由血氣衰損為風所客令血氣不相周榮於肌肉故令偏枯也

風眩候

風眩是體虛受風風入於腦也諸腑臟之精皆上注於目其血氣與脈并上屬於腦循脈引於目系目系急故令眩也其眩不止風邪甚者變癰倒為癰疾

癰狂候

癰者卒發仆地吐涎沫口喎目急手足繚戾無所覺知

良久乃甦狂者或言語倒錯或自高賢或罵詈不避親疎亦有自定之時皆由血氣虛受風邪所為人稟陰陽之氣而生風邪入并於陰則為癲入并於陽則為狂陰之與陽更有虛有實隨其虛時為邪所并則發故發癲又發狂又在胎之時其母卒大驚動精氣并居亦令子發癲此則小兒而發癲者是非關長因血氣虛損受風邪所為又有五癲一曰陽癲二曰陰癲三曰風癲四曰濕癲五曰勞癲此蓋隨其感處之由立名又有牛馬猪

雞狗之癩皆死其癩發之時聲形狀似於牛馬等故以
為名也俗云病癩人忌食六畜之肉食者癩發之狀皆
悉象之

風瘙癢候

風瘙癢者是體虛受風風入腠理與血氣相搏而俱往
來在於皮膚之間邪氣微不能衝擊為痛故但瘙癢也

風蠱候

風蠱者由體虛受風風在皮膚之間其狀淫淫躍躍若

蠱物刺一身盡痛侵傷血氣動作如蠱毒之狀謂之風蠱

癩候

癩病是賊風入百脈傷五臟連注骨髓俱傷而發於外使眉睫墮落皮肉生瘡筋爛節斷語聲嘶破而毒風之變冷熱不同故腠理發癩形狀亦異

氣候

氣病是肺虛所為肺主氣五臟六腑皆稟氣於肺憂思

恐怒居處飲食不節傷動肺氣者並成病其氣之病有
虛有實其肺氣實謂之有餘則喘逆上氣其肺氣虛謂
之不足則短乏少氣而有冷有熱熱則四肢煩熱也冷
則手足逆冷

心痛候

心痛是臟虛受風風冷邪氣乘於心也其痛發有死者
有不死成疹者心為諸臟主而藏神其正經不可傷傷
之而痛者名為真心痛朝發夕死心之肢別絡為風冷

所乘而痛者故痛發乍間乍甚而成疹也

心腹痛候

心腹痛者腑臟虛弱風邪客於其間與真氣相擊故痛其痛隨氣下上或上衝於心或下攻於腹故心腹痛

腹中痛候

腹痛者由臟腑虛弱風冷邪氣乘之邪氣與正氣相擊則腹痛也

小腹痛候

小腹痛者此由胞絡之間宿有風冷搏於血氣停結小腹因風虛發動與血相擊故痛

月水不調候

婦人月水不調由勞傷氣血致體虛受風冷風冷之氣客於胞內傷衝脈任脈損手太陽少陰之經也衝任之脈皆起於胞內為經絡之海手太陽小腸之經手少陰心之經此二經為表裏主上為乳汁下為月水然則月水是經絡之餘若冷熱調和則衝脈任脈氣盛太陽少

陰所主之血宣流以時而下若寒溫乖適經脈則虛有風冷乘之邪搏於血或寒或溫寒則血結溫則血消故月水乍多乍少為不調也診其脾脈沈沈而喘浮之而虛若腸脹煩滿胃中有熱不嗜食食不化大便難四肢苦痺時不仁得之房內月事不來來而併又少陰脈澀則血不來此為居經三月一來又脈微血氣俱虛年少者亡血之脈也乳子下利為可不調者此為居經亦三月一來又經水一月再來者經來時其脈欲自如常而

反微者不利不汗出者其經二月必來

養生方云病憂悲泣哭以令陰陽結氣不和故令月水時少時多內熱苦渴色惡體肌枯身重

月水不利候

婦人月水不利者由勞傷血氣致令體虛而受風冷風冷客於胞內損傷衝任之脉手太陽少陰之經故也衝脈任脈之海皆起於胞內手太陽小腸之經也手少陰心之經也此二經為表裏主下為月水風冷客於經絡

搏於血氣血得冷則壅滯故令月水來不宣利也診其
脉從寸口邪入上者名曰解脉來至狀如琴絃苦小腹
痛經月不利孔竅生瘡又左手關上脉足厥陰經也沈
為陰陰虛者主月經不利腰腹痛尺脉滑血氣實經絕
不利入脉左手尺來而斷絕者月水不利也又脉寸關
調如故而尺脈絕而不至者月經不利當患小腹引腰
絞痛氣積聚上叉脅脅

月水來腹痛候

婦人月水來腹痛者由勞傷血氣以致體虛受風冷之氣客於胞絡損衝任之脈手太陽少陰之經衝脈任脈皆起於胞內為經脈之海也手太陽小腸之經手少陰心之經也此二經共為表裏主下為月水其經血虛受風冷故月水將下之際血氣動於風冷風冷與血氣相擊故令痛也

月水不斷候

婦人月水不斷者由損傷經血衝脈任脈虛損故也衝

任之脈為經脈之海手太陽小腸之經也手少陰心之經也此二經為表裏主下為月水勞傷經脈衝任之氣虛損故不能制其經血故令月水不斷也凡月水不止而合陰陽冷氣上入藏令人身體面目痿黃亦令絕子不產也

月水不通候

婦人月水不通者由勞損血氣致令體虛受風冷風冷邪氣客於胞內傷損衝任之脈并手太陽少陰之經致

胞絡內絕血氣不通故也衝任之脈起於胞內為經脈之海手太陽小腸之經也手少陰心之經也此二經為表裏主下為月水風冷傷其經血血性得溫則宣流得寒則澀閉既為冷所結搏血結在內故令月水不通

又云腸中鳴則月事不來病本於胃所以然者風冷干於胃氣胃氣虛不能分別水穀使津液不生血氣不成故也 又云醉以入房則內氣竭絕傷肝使月事衰少不來也所以爾者肝藏於血勞傷過度血氣枯竭於內

也又先經唾血及吐血下血謂之脫血使血枯亦月事
不來也又利血經水亦斷所以爾者津液減耗故也利
止津液生其經自下診其腎脈微澀為不利者是月水
不來也又左手關後尺內浮為陽絕者無膀胱脈也月
事則閉又肝脈沈之而急浮之亦然時小便難苦頭眩
痛腰背痛足為寒時疼月事不來時恐得之少之時有
所墮墜也月水不通久則血結於內生塊變為血瘕亦
作血癥血水相併壅塞不宣通脾胃虛弱變為水腫也

所以然者脾候身之肌肉象於土土主能尅消於水水血既併脾氣衰弱不能尅消故水氣流溢浸漬肌肉故腫滿也

帶下候

帶下者由勞傷過度損動經血致令體虛受風冷風冷入於胞絡搏其血之所成也衝脈任脈為經絡之海任之為病女子則帶下而手太陽為小腸之經也手少陰心之經也心為臟主於裏小腸為府主於表此二經之

血在於婦人上為乳汁下為月水衝任之所統也衝任之脈既起於胞內陰陽過度則傷胞絡故風邪乘虛而入於胞損衝任之經傷太陽少陰之血致令胞絡之間穢液與血相兼帶帶而下冷則多白熱則多赤故名帶下又帶有三門一曰胞門二曰龍門三曰玉門已產屬胞門未產屬龍門未嫁屬玉門又未嫁女亦有三病一者經水初下陰內熱或當風或因扇得冷二者或因以寒水洗之得又三者或見月水初下驚恐得病皆屬帶

下也又婦人年五十所病下利數十日不止暮發熱小腹裏急痛腹滿手掌熱煩脣口乾燥此因曾經半產瘀血在小腹不去此疾必帶下所以知瘀血者脣口燥即是其證又婦人年五十所病但若背痛時時腹中痛少食多厭診其脈陽微關尺小緊形脈不相應病如此在下焦此必帶下又婦人帶下六極之病脈浮即腸鳴腹滿脈緊即腸中痛脈數則陰中癢痛生瘡脈弦則陰疼掣痛

帶五色俱下候

帶下病者由勞傷血氣損動衝脉任脉致令其血與穢液兼帶而下也衝任之脉為經脈之海經血之行內榮五臟五臟之色隨臟不同傷損經血或冷或熱而五臟俱虛損者故其色隨穢液而下為帶五色俱下

帶下青候

此由勞傷血氣損動衝脉任脉衝任之脉皆起於胞內為經脈之海手太陽小腸之經也手少陰心之經也此

二經主下為月水若經脈傷損衝任氣血不能約制經血則與穢液相兼而成帶下然五臟皆稟血氣其色則隨臟而不同肝藏之色青帶下青者是肝藏虛損故帶下而挾青色

帶下黃候

勞傷血氣損動衝脈任脈衝任之脈皆起於胞內為經脈之海手太陽小腸之經也手少陰心之經也此二經主下為月水若經脈傷損衝任氣虛不能約制經血則

血與穢液相兼而成帶下然五臟皆稟血氣其色則隨臟不同脾藏之色黃帶下黃者是脾藏虛損故帶下而挾黃色

帶下赤候

勞傷血氣損動衝脈任脈衝任之脈皆起胞內為經脈之海手太陽小腸之經也手少陰心之經也此二經主下為月水若經脈傷損衝任氣虛不能約制經血則與穢液相兼而成帶下然五臟皆稟血氣其色則隨臟不

同心臟之色赤帶下赤者是心藏虛損故帶下而挾赤色

帶下白候

勞傷血氣損動衝脈任脈衝任之脈皆起於胞內為經脈之海手太陽小腸之經也手少陰心之經也此二經主下為月水若經脈傷損衝任氣虛不能約制經血則血與穢液相兼而成帶下然五臟皆稟血氣其色則隨臟不同肺臟之色白帶下白者肺臟虛損故帶下而挾

白色也

帶下黑候

勞傷血氣損動衝脈任脈衝任之脈皆起於胞內為經脈之海手太陽小腸之經也手少陰心之經也此二經主下為月水若經脈傷損衝任氣虛不能約制經血則血與穢液相兼而成帶下然五臟皆稟血氣其色則隨臟不同腎臟之色黑帶下黑者是腎臟虛損故帶下而挾黑色也

帶下月水不利候

帶下之病由勞傷血氣損動衝脈任脈衝任之脈起於胞內為經脈之海經血傷損故血與穢液相兼而成帶下帶下輸瀉則臟虛而重被風冷乘之入傷手太陽少陰之經則使月水不利所以爾者手太陽小腸之經也為腑主表手少陰心之經也為臟主裏此二經共合其經血上為乳汁下為月水血性得寒則澀既為風冷所乘故帶下而血澀所以月水不利也

帶下月水不通候

帶下之病由勞傷血氣損動衝脈任脈衝脈任脈起於胞內為經脈之海經血傷損故血與穢液相兼而成帶下帶下輸瀉則臟虛而重被風冷乘之入傷手太陽少陰之經則使月水不通所以爾者手太陽小腸之經也為腑主表手少陰心之經也為臟主裏此二經共合其經血上為乳汁下為月水血性得寒則澀既為風冷所乘冷氣沉積故血結壅所以帶下月水不通凡月水不

通血結積聚變成血瘕血瘕亦變面目浮腫也

巢氏諸病源候總論卷三十七

欽定四庫全書

巢氏諸病源候總論卷三十八

隋 巢元方 撰

婦人雜病諸候二 凡一十九論

漏下候

漏下者由勞傷血氣衝任之脈虛損故也衝脈任脈為十二經脈之海皆起於胞內而手太陽小腸之經也手少陰心之經也此二經主上為乳汁下為月水婦人經

脈調適則月水以時若勞復者以衝任之氣虛損不能制其經脈故血非時而下淋瀝不斷謂之漏下也診其寸口脈弦而大弦則為減大則為芤減即為寒芤即為虛寒芤相搏其脈為牢婦人即半產而下漏又尺寸脈虛者漏血漏血脈浮不可治也

養生方云懷娠未滿三月服藥自傷下血下血未止而合陰陽邪氣結因漏治不止狀如腐肉在於子臟令內虛

漏五色俱下候

漏下之病由勞傷血氣衝任之脈虛損故也衝脈任脈為經脈之海起於胞內手太陽小腸之經也手少陰心之經也此二經之血主上為乳汁下為月水衝任之脈虛損不能約制其經血故血非時而下淋瀝成漏也五臟皆稟血氣虛則淋瀝漏致五臟傷損五臟之色隨臟不同若五臟皆虛損者則漏五色隨血而下診其尺脈急而弦大者風邪入少陰女子漏白下赤又漏下赤白

不止脈小虛滑者生脈大緊實數者死也又漏血下赤白日下血數斗脈急疾者死遲者生

養生方云夫婦自共諍訟訟意未和平強從子臟閉塞留結為病遂成漏下黃白如膏

漏下青候

勞傷血氣衝脈任脈虛損衝任之脈皆起於胞內為經脈之海手太陽小腸之經也手少陰心之經也此二經主下為月水傷損經血衝任之氣虛故血非時而下淋

瀝不斷而成漏下五臟皆稟血氣肝臟之色青漏下青者是肝臟之虛損故漏下而挾青色也

漏下黃候

勞傷血氣衝任之脈皆起於胞內為經脈之海手太陽小腸之經也手少陰心之經也此二經主下為月水傷損經血衝任之氣虛故血非時而下淋瀝不斷而成漏下五臟皆稟血氣脾臟之色黃漏下黃者是脾臟之虛損故漏下而挾黃色也

漏下赤候

勞傷血氣衝脈任脈皆起於胞內為經脈之海手太陽小腸之經也手少陰心之經也此二經者主下為月水傷損經血衝任之氣虛故血非時而下淋瀝不止而成漏下五臟皆稟血氣心臟之色赤漏下赤者是心臟之虛損故漏下而挾赤色也

漏下白候

勞傷血氣衝任之脈皆起於胞內為經脈之海手太陽

小腸之經主下為月水傷損經血衝任之氣虛故血非時而下淋瀝不斷而成漏下五臟皆稟血氣肺臟之色白漏下白者是肺臟之虛損故漏下而挾白色也

漏下黑候

勞傷血氣衝任之脈皆起於胞內為經脈之海手太陽小腸之經也手少陰心之經也此二經主下為月水傷損經血衝任之氣虛故血非時而下淋瀝不斷而成漏下五臟皆稟血氣腎臟之色黑漏下黑者是腎臟之虛

損故漏下而挾黑色也

崩中候

崩中者腑臟傷損衝脈任脈血氣俱虛故也衝任之脈為經脈之海血氣之行外循經絡內榮腑臟若無傷則腑臟平和而氣調適經下以時若勞動過度致腑臟俱傷而衝任之氣虛不能約制其經血故忽然暴下謂之崩中診其寸口脈微遲尺脈微於寸寸遲為寒在上焦但吐耳今尺脈遲而弦如此小腸痛腰脊痛者必下血

也

白崩候

白崩者是勞傷胞絡而氣極所為肺主氣氣極則肺虛冷也肺臟之色白虛冷勞極其色與胞絡之間穢液相挾崩傷而下為白崩也

崩中五色俱下候

崩中之病是傷損衝任之脈衝任之脈皆起於胞內為經脈之海勞傷過度衝任氣虛不能統制經血故忽然

崩下謂之崩中五臟皆稟血氣五臟之色隨臟不同傷損之人五臟皆虛者故五色隨崩俱下其狀白崩形如涕赤崩形如紅汁黃崩形如爛瓜汁青崩形如藍色黑崩形如乾血色

崩中漏下候

崩中之狀是傷損衝任之脈衝任之脈皆起於胞內為經脈之海勞傷過度衝任氣虛不能約制經血故忽然崩下謂之崩中崩而內有瘀血故時崩時止淋瀝不斷

名曰崩中漏下

崩中漏下五色候

崩中之病是勞傷衝任之脈衝任之脈起於胞內為經脈之海勞傷過度衝任氣虛不能統制經血故忽然崩下謂之崩中而有瘀血在內遂淋瀝不斷謂之漏下漏下不止致損於五臟五臟之色隨臟不同因虛而五色與血俱下其狀白者如涕赤者如紅汁黃者如爛瓜汁青者如藍色黑者如乾血色相雜雜而下也

積聚候

積者五臟所積聚者六腑所成五臟之氣積名曰積六腑之氣聚名曰聚也積痛不離其部聚者其痛無有常處皆由陰陽不和風冷搏於臟腑而生積聚也婦人病積經久則令無子亦令月水不通所以然者積聚起於冷結入子臟故令無子若冷氣入於胞絡冷搏於血血冷則澁結故令月水不通

癖病候

癖病者由冷氣結聚飲食不消停積於脅下則成癖病其狀弦急刺痛得冷則發作也

疝瘕候

疝瘕之病由飲食不節寒溫不調氣血勞傷臟腑虛弱受於風冷令人腹內與血氣相結所生疝者痛也瘕者假也其結聚浮假而痛推移而動婦人病之有異於丈夫者或因產後臟虛受寒或因經水往來取冷過度非獨關飲食失節多挾有血氣所成也診婦人疝瘕其脈

弦急者生虛弱小者死又尺脈濇而浮牢為血實氣虛也其發腹痛逆滿氣上行此為婦人胞中絕傷有惡血久成結瘕得病以冬時來其鼻則赤

瘕瘕候

瘕瘕者由冷熱不調飲食不節積在腹內或腸胃之間與臟相結搏其牢強推之不移名曰瘕言其病形徵可驗也氣壅塞為瘕言其氣瘕澁不宣暢也皆得冷則發動刺痛瘕瘕之病其形冷結若冷氣入於子臟則使無子

若冷氣入於胞絡搏於血氣血得冷則澁令月水不通也

八瘕候

八瘕者皆胞胎生產月水往來血脈精氣不調之所生也腎為陰主開閉左為胞門右為子戶主定月水生子之道胞門子戶主子精神氣所出入合於中黃門玉門四邊主持關元禁閉子精臍下三寸名曰關元主臟魄魄婦人之胞三焦之府常所從止然婦人經脈俞絡合

調則月水以時來至故能生子而無病婦人榮衛經絡
斷絕不通邪氣便得往入合於臟若生血未盡而合陰
陽即令婦人血脈攣急小腹重急丈夫滿胃脅腰背相引
四支酸痛飲食不調結牢惡血不除月水不時或月前
月後因生積聚如懷胎狀邪氣甚盛者令人恍惚多夢
寒熱四肢不欲動陰中生氣腫内生風甚者害小便瀉
瀉而痛淋瀝面黃黑成病則不復生子其八瘕者黃瘕
青瘕燥瘕血瘕脂瘕狐瘕蛇瘕鼈瘕也 黃瘕者婦人

月水始下若新傷墮血氣未止臥寤未定五臟六腑虛
羸精神不治因以當向大風便利陰陽開闔節四邊中
於濕風氣從下上入陰裏稽留不去名為陰陽虛則生
黃瘕瘕之聚令人苦四肢寒熱身重淋露不欲食左脅
下有血氣結牢不可得而抑苦腰背相引痛月水不利
令人不產小腹下陰中如刀刺不得小便時苦寒熱下
赤黃病令人無子 青瘕者婦人新產未滿十日起行
以浣洗太早陰陽虛玉門四邊皆解散子戶未安骨肉

皆痛手臂不舉飲食未復內臟吸吸又當風臥不自隱
蔽若居濕席令人苦寒洒洒入腹煩悶沈淖惡血不除
結熱不得前後便化生青瘕瘕聚在右脅藏於背脊上
與髀髀腰下攣兩足腫面目黃大小便難其後月水為
之不通利或不復禁狀如崩中此自其過所致令人少
子 燥瘕者婦人月水下惡血未盡其人虛憊而已夏
月熱行疾走若舉重移輕汗出交流氣力未平而率以
急悉以喜致猥咽不洩經脈攣急內結不舒煩滿少氣

上達胃鬲背脊小腹為急月水與氣俱不通而反以飲
清水快心月水橫流行入他臟不去有熱因生燥瘕之
聚大如半杯上下腹中苦痛還兩脅下上引心而煩害
飲食欲吐胃及腹中不得大息腰背重喜臥血汗足酸
疼痛久立而痛小便失時居然自出若失精月水閉塞
大便難病如此者其人少子 血瘕病婦人月水新下
未滿日數而中止飲食過度五穀氣盛溢入他臟若大
飢寒汲汲不足呼吸未調而自勞血下未定左右走腸

胃之間留絡不去內有寒熱與月水合會為血瘕之聚
令人腰痛不可以俛仰橫骨下有積氣牢如石小腹裏
急苦痛背脊疼深達腰腹下攣陰裏若生風冷子門辟
月水不時乍來乍不來此病令人無子 脂瘕者婦人
月水新來若生未滿三十日以合陰陽絡脈分胞門傷
子戶失禁開即散五臟六腑津液流行陰道潤動百脈
關樞四解外不見其形子積與血氣相遇犯禁子精化
不足成子則為脂瘕之聚令人丈夫滿裏急痛疾痺引小

腹重腰背如刺狀四肢不舉飲食不甘臥不安席左右
走腹中切痛時瘥時甚作者少氣頭眩身體解以苦寒
惡風膀胱脹月水乍來乍去不如常大小便血不止如
此者令人無子 狐瘕者婦人月水當日數來而反悲
哀憂恐以遠行逢暴風疾雨雷電驚恐衣被沈濕疲倦
少氣心中怵怵未定四肢懈惰振寒脈氣絕精神遊亡
胞氣入於陰裏不去生狐瘕之聚食人臟令人月水閉
不通小腹瘕與胃脅腰背痛陰中腫小便難胞門子戶

不受男精五臟氣盛令嗜食欲嘔若睡多所思如有娠
狀四肢不舉有此病者終身無子其瘕有手足成形者
殺人也未成者可治 蛇瘕者婦人月水已下新止適
閉未復胞門子戶勞傷陰陽未平復榮衛分行若其中
風暴病羸劣飲食未調若已起當風行厥度泥塗用清
寒太早若坐濕地名陰陽亂腹中虛且未飲食若遠道
之餘汚井之水不潔之食吞蛇鼠之精留絡不去因生
蛇瘕之聚上食心肝長大其形若漆在臍上下還疔左

右脅不得氣兩股脛間若漆疾小腹疾小便赤黃膀胱引陰中攣腰目痛難以動作苦寒熱之後月水有多有少有此病者不復生子其手足成形者殺人未成者可治 鼈瘕者婦人月水新至其人劇吐疲勞衣服沈濕不以時去若當風睡兩足踐濕地恍惚覺悟蹠立未安顏色未平復見所好心為開魂魄感動五內脫消若以入水浣洗沐浴不以時出神不守水精與邪氣俱入至上三焦之中募玉門先閉津液妄行留絡不去因生鼈

瘕之聚大如小盤令人小腹切痛痛惡氣走上下腹中
苦痛若存若亡持之躍手不利陰裏腰背亦痛不可以
息月水喜敗不通面目黃黑脫聲少氣有此病者令人
絕子其瘕有手足成形者殺人未成者可治

帶下三十六疾候

諸方說三十六疾者是十二瘕九痛七害五傷三固謂
之三十六疾也十二瘕者是所下之物一者如膏二者
如青血三者如紫汁四者如赤皮五者如濃瘀六者如

豆汁七者如葵羹八者如凝血九者如青血血似水十
者如米汁十一者如月浣十二者經度不應期也 九
痛者一者陰中痛傷二者陰中淋痛三者小便即痛四
者寒冷痛五者月水來腹痛六者氣滿並痛七者汁出
陰中如蟲齧痛八者脅下皮痛九者腰痛 七害者一
者害食二者害氣三者害冷四者害勞五者害房六者
害姪七者害睡 五傷者一者窮孔痛二者中寒熱痛
三者小腹急牢痛四者藏不仁五者子門不正引背痛

三固者一者月水閉塞不通其餘二固者文闕不載而張仲景所說三十六種疾皆由于臟冷熱勞損而挾帶下起於陰內條目混漫與諸方不同但仲景義最玄深非愚淺能解恐其文雖異其義理實同也


無子候

婦人無子者其事有三也一者墳墓不祀二者夫婦年命相尅三者夫病婦疹皆使無子其若是墳墓不祀年命相尅此二者非藥能益若夫病婦疹須將餌故得有

效也然婦人挾疾無子皆由勞傷血氣冷熱不調而受風寒客於子宮致使胞內生病或月經澀閉或崩血帶下致陰陽之氣不和經血之行乖候故無子也診其右手關後尺脈浮則為陽陽脈絕無子也又脈微澀中年得此為絕產也少陰脈如浮緊則絕產惡寒脈尺寸俱微弱則絕嗣不產也其湯熨針石別有正方補益吐納今附於後

養生方云月初出時日入時向月正立不息八通仰頭

吸月光精八咽之令人陰氣長婦人吸之陰氣益盛子
道通陰氣長益精髓腦少小者婦人至四十九已上還
生子斷緒者即有子久行不已即成仙矣



巢氏諸病源候總論卷三十八

欽定四庫全書

子部

巢氏諸病源候總論卷

三十九至
四十二

詳校官太醫院恩種_臣孔毓秀

編修_臣倉聖脈覆勘

總校官庶吉士

_臣何思鈞

校對官中書

_臣吳俊

謄錄舉人

_臣楊兆豐

欽定四庫全書

巢氏諸病源候總論卷三十九

隋 巢元方 撰

婦人雜病諸候三凡四十論

月水不利無子候

月水不利而無子者由風寒邪氣客於經血則令月水

否澀血結子臟陰陽之氣不能施化所以無子也

月水不通無子候

月水不通而無子者由風寒邪氣客於經血夫血得溫則宣流得寒則凝結故月水不通冷熱血結搏于臟而成病致陰陽之氣不調和月水不通而無子也月水久不通非止令無子血結聚不消則變為血瘕經久盤結成塊亦作血瘕血水相并津液壅澀脾胃衰弱者水氣流溢變為水腫如此難可復治多致斃人

養生方云少時若新產後急帶舉重子陰挺出或傾邪月水不瀉陰中激痛下塞令人無子

子臟冷無子候

子臟冷無子者由將攝失宜飲食不節乘風取冷或勞傷過度致風冷之氣乘其經血結於子臟子臟則冷故無子

帶下無子候

帶下無子者由勞傷於經血經血受風邪則成帶下帶下之病白沃與血相兼帶而下也病在於子臟胞內受邪故令無子也診其右手關後尺中脈浮為陽陽絕者無

子力脈也若足逆冷帶下故也

結積無子候

五臟之氣積名曰積藏積之生皆因飲食不節當風取冷過度其子臟勞傷者積氣結搏於子臟致陰陽血氣不調和故病結積而無子

養生方云月水未絕以合陰陽精氣入內令月水不節內生積聚令絕子不復產乳

數失子候

婦人數失子者或由乖陰陽之理或由觸犯禁忌既產之後而數失兒乃非腑臟生病故可以方術防斷之也

腹滿少氣候

腹滿少氣者由臟虛而觸風冷風冷搏於血氣故腹滿腹滿則氣壅在內而呼吸不足常如少氣之故故云少氣腹滿也

胃脅脹滿候

胃脅脹滿者由勞傷體虛而風冷之氣乘之客於臟腑

腸胃之間搏於血氣血氣壅之不宣氣得冷則逆與血飲相搏上搶胃脅所以令胃脅脹滿也

客熱候

人血氣有陰陽臟腑有虛實實則生熱虛則受寒互相乘加此人身內陰陽冷熱自相乘也此云客熱者是體虛而將溫過度外熱加之非臟腑自生故云客熱也其狀上焦胃膈之間虛熱口燥或手足煩熱腸胃之內無實熱也

煩滿候

煩滿者由體虛受邪使氣血相搏而氣逆上乘於心胃氣否不宣故令煩滿煩滿者心煩胃間氣滿急也

身體卒痛候

身體卒痛者由勞動血氣而體虛受於風冷客其經絡邪氣與正氣交擊於肌肉之間故身體卒痛也

左脅痛如刀刺候

左脅偏痛者由經絡偏虛邪故也人之經絡循環於身

左右表裏皆周徧若氣血調和不生虛實邪不能傷偏
虛者偏受風邪今此云脅痛者左邊偏受病也但風邪
在於經絡與血氣相乘交爭衝擊故痛發如刀刺

痰候

痰者由水飲停積在於胃膈所成人皆有痰少者不能
為害多則成患但胃膈飲漬於五臟則變令目眩頭痛
也

嗽候

嗽者肺傷微寒故也寒之傷人先傷肺者肺主氣候皮毛故寒客皮毛先傷肺也其或寒微者則欬嗽也

咽中如炙肉嚮候

咽中如炙肉嚮者此是胃膈痰結與氣相搏逆上咽喉之間結聚狀如炙肉之嚮也

喉痛候

喉痛者風熱毒客於其間故也十二經脈有循頰喉者五臟在內而經脈循於外臟氣虛則經絡受邪邪氣搏

於臟氣則生熱熱乘其脈熱搏咽喉故令喉痛也

癭候

癭病者是氣結所成其狀頸下及皮寬臃臃然憂恚思慮動於腎氣腎氣逆結宕所生又諸山州縣人飲水多者沙搏於氣結頸下亦成癭也

吐血候

吐血者皆由傷損腑臟所為夫血外行經絡內榮腑臟若傷損經絡臟腑則虛血行失其常理氣逆者吐血又

怒則氣逆甚則嘔血然憂思驚怒內傷腑臟氣逆上者皆吐血也

口舌出血候

口舌出血者心脾傷損故也脾氣通於口心氣通於舌而心主血脈血榮於臟腑通於經絡若勞損臟腑傷動經脈隨其所傷之經虛者血則妄行然口舌出血心脾二臟之經傷也

汗血候

汗血者肝心二臟虛故也肝藏血而心主血脈心之液為汗肝是木心是火母子也血之行內在腑臟外通經絡勞傷肝心其血脈虛者隨液發為汗而出也

金瘡敗壞候

婦人金瘡未瘡而交會動於血氣故令瘡敗壞

耳聾候

耳聾風冷傷於腎腎氣通於耳勞傷腎氣風冷客之邪與正氣相搏使經氣不通故耳聾也

耳聾風腫候

耳聾風腫者風邪搏於腎氣故也腎氣通於耳邪搏其經血氣壅澀不得宣發故結腫也

眼赤候

眼皆赤者風冷客於腎間與血氣相搏而淚液乘之挾熱者則令皆赤

風眩鼻塞候

風眩而鼻塞者風邪乘腑臟入於腦也五臟六腑之精

氣皆上注於目血與氣并屬於腦體虛為風邪入腦則引目目系急故令頭眩而腑臟皆受氣於肺肺主氣外候在鼻風邪入腦又搏肺氣故頭眩而鼻塞

鼻衄候

鼻衄者由傷動血氣所為五臟皆稟血氣血氣和調則循環經絡不澀不散若勞傷損動因而生熱氣逆流溢入鼻者則成鼻衄也

面黑肝候

面黑肝者或臟腑有痰飲或皮膚受風邪皆令血氣不調致生黑肝五臟六腑十二經血皆上於面夫血之行俱榮表裏人或痰飲清藏或腠理受風致血氣不和或澀或濁不能榮於皮膚故變生黑肝若皮膚受風水治則瘡腑臟有飲內療方愈也

面黑子候

面黑子者風邪搏血氣變化所生夫人血氣充盛則皮膚潤悅若虛損疵點變生黑子者是風邪變其血氣所

生若生而有之者非藥可治也

蛇皮候

蛇皮者由風邪客於腠理也人腠理受於風則閉密使血氣澀濁不能榮潤皮膚斑剝其狀如蛇鱗世呼蛇體也亦謂之蛇皮也

手逆臚候

手逆臚者經脈受風邪血氣否澀也十二經筋脈有起手指者其經虛風邪客之使血氣否澀皮臚枯剝逆起

謂之逆臚

白禿候

頭瘡有蟲痂白而髮禿落謂之白禿云是人腹內九蟲
內蛙蟲值血氣虛發動所作也

耳後附骨癰候

附骨癰是風寒搏血脈入深近附於骨也十二經之筋
脈有絡耳後完骨者虛則風寒客之寒氣折血血否澀
不通深附於骨而成癰也其狀無頭但腫痛

腫滿水氣候

水病由體虛受風濕入皮膚搏津液津液否澀壅滯在內不消而流溢皮膚所以然者腎主水與膀胱合膀胱為津液之府津液不消則水停蓄其外候目下如臥蠶頸邊人迎脈動甚也脾為土主剋水而脾候肌肉腎水停積脾土衰微不能消令水氣流溢浸漬皮膚而腫滿

血分候

血分病者是經血先斷而後成水病以其月水壅澀不

通經血分而為水故曰血分婦人月經通流流則水血
消化若風寒搏於經脈血結不通血水而蓄積成水腫
病

卒腫候

夫腫或風冷或水氣或熱毒此卒腫由腠理虛而風冷
搏於血氣壅結不宣故卒然而腫其狀但結腫而不熱
是也

赤流腫候

赤流腫者由體虛腠理開而風熱之氣客之風熱與血氣相搏挾熱毒其狀腫起色赤隨氣流行移易故云流腫

瘀血候

此或月經否澀不通或產後餘穢未盡因而乘風取涼為風冷所乘血得冷則結成瘀也血瘀在內則時時體熱面黃瘀久不消則變成積聚癥瘕也

傷寒候

此謂人觸冒於寒氣而成病冬時嚴寒攝衛周密者則寒不能傷人若辛苦勞役汗出觸冒寒氣即發成病謂之傷寒也其輕者微欬嗽鼻塞嗇嗇小寒噲噲微熱數日而歇重者頭痛體疼惡寒壯熱而膏腴之人肌膚脆弱雖不大觸冒其居處小有失宜則易傷於寒也自有四時節內忽有暴寒傷於人成病者亦名傷寒謂之時行傷寒非觸冒所致言此時通行此氣故為時行也

時氣候

此謂四時之間忽有非節之氣傷人而成病也如春時應暖而寒夏時應熱而冷秋時應涼而熱冬時應寒而溫言此四時通行此氣一氣之至無間少長病皆相似故名為時氣也但言其病名風寒所傷則輕狀猶如傷寒小頭痛壯熱也若挾毒厲之氣則重壯熱煩毒或心腹脹滿多死也

瘧候

夫瘧病者由夏傷於暑客在皮膚至秋因勞動血氣腠

理虛而風邪乘之動前暑熱正邪相擊陰陽交爭陽盛則熱陰盛則寒陰陽更虛更盛故發寒熱陰陽相離則寒熱俱歇若邪動氣至交爭復發故瘧休作有時其發時節漸晏者此由邪客於風府邪循膂而下衛氣一日一夜常大會於風府其明日日下一節故其作日晏其發日早者衛氣之行風府日下一節二十一日下至尾骶二十二日入脊內上注於伏衝之脈其行九日出於缺盆之內其氣既上故其病發更早其間日發者由邪

氣內薄五藏橫連募原其道遠其氣深其行遲不能日
作故間日作蓄積乃發凡病瘧多渴引飲飲不消乃變
為癖大腸虛引飲水入腸胃則變為利也

巢氏諸病源候總論卷三十九

欽定四庫全書

巢氏諸病源候總論卷四十

隋 巢元方 撰

婦人雜病諸候四

凡五十論

霍亂候

陰陽清濁相干謂之氣亂氣亂在腸胃為霍亂也多因飲食過度胃觸風冷冷氣入於腹內脾氣得冷則不消水穀胃氣得冷則吐逆腸氣得冷則下利其心痛者先

吐腹痛者先利心腹俱痛吐利並發其有頭痛壯熱而吐利者由體盛而挾風之氣搏之外與血氣交爭故頭痛發熱也內乘腸胃故霍亂吐利也

嘔吐候

胃氣逆則嘔吐胃為水穀之海其氣不調而有風冷乘之冷搏於胃氣胃氣逆則嘔吐也

嬖子小兒注車船候

無問男子女人乘車船則心悶亂頭痛吐逆謂之注車

注船特由質性自然非關宿挾病也

與鬼交通候

人稟五行秀氣而生承五臟神氣而養若陰陽調和則
臟腑強盛風邪鬼魅不能傷之若攝衛失節而血氣虛
衰則風邪乘其虛鬼干其正然婦人與鬼交通者臟腑
虛神守弱故鬼氣得病之也其狀不欲見人如有對忤
獨言笑或時悲泣是脈來遲伏或如鳥啄皆邪物病也
又脈來綿綿不知度數而顏色不變此亦病也

夢與鬼交通候

夫臟虛者喜夢婦人夢與鬼交亦由腑臟氣弱神守虛衰故乘虛因夢與鬼交通也

脚氣痛弱候

脚氣之病由人體虛溫濕風毒之氣先客於脚從下而上動於氣故名脚氣也江東嶺南土地卑下風濕之氣傷於人初得此病多不即覺或先無他疾而忽得之或因衆病後得之此病初甚微飲食嬉戲氣力如故當熟

察之其狀從膝至脚有不仁或若痺或淫淫如蟲行或微腫或酷冷或疼痛或緩縱不隨或有攣急或有至困能飲食或有不能食者或有見飲食而嘔吐者惡聞食臭者或有物如脂發於喘腸逆上衝心氣上者或有舉體轉筋者或壯熱頭痛者或心胃衝悸寢處不欲見明或腹內苦痛而兼下者或言語錯亂喜忘誤者或眼濁精神昏憤者此皆其證候也治之緩者便上入腹腹或腫胃脇滿上氣賁便死急者不全日緩者二三日也其

病既入臟證皆相似但脈有三品若脈浮大而緩宜服續命湯兩劑若風盛者宜作越婢湯加朮四兩若脈轉駛而緊宜服竹瀝湯若脈微宜服風引湯二三劑其緊駛之脈是三品之最惡脈也脈浮大者病在外沉細者病在內皆當急治之治之緩慢則上氣便死也

腳氣腫滿候

溫濕風毒從脚而上故令四肢懈惰緩弱疼痛甚則上攻名腳氣而津液為風濕所折則津液否澀而蓄積成

水內則浸漬臟腑外則流溢皮膚故令腠理脹密水氣積不散故腫也

淋候

淋腎虛而膀胱熱也膀胱與腎為表裏俱主水行於胞者為小便也腑臟不調為邪所乘腎虛則小便數膀胱熱則小便澀其狀小便痛疼澀數淋瀝不宣故謂之淋也

石淋候

淋而出石謂之石淋腎主水水結則化為石故腎客沙石腎為熱所乘則成淋腎虛則不能制石故淋而出石細者如麻如豆大者亦有結如皂莢核狀者發則燥痛悶絕石出乃歇

胞轉候

胞轉之病由胞為熱所迫或忍小便俱令水氣還迫於胞屈辟不得充張外水應入不得入內溲應出不得出內外壅脹不通故為胞轉其狀小腹急痛不得小便甚

者至死張仲景云婦人本肥盛豆舉自滿全羸瘦豆舉空減胞系了戾亦致胞轉

小便不利候

腎與膀胱為表裏俱主水水行小腸入胞為小便熱搏其藏熱氣蘊積水行則澀故小便不利也

小便不通候

水行於小腸入胞為小便腎與膀胱俱主水此二經為臟腑若內生大熱熱氣入小腸及胞胞內熱故小便不

通令小腹脹滿氣喘息也

大便不通候

三焦五臟不調和冷熱之氣結於腸胃津液竭燥大腸
壅澀故大便不通張仲景云婦人經水過多亡津液者
亦大便難也

大小便不利候

冷熱不調大小腸有遊氣壅在大小腸不得宣散蓄積
結生熱故大小便澀不流利也

大小便不通候

腑臟不和榮衛不調陰陽不相通大小腸否結名曰關
格關格故大小便不通自有熱結於大腸則大便不通
熱結於小腸則小便不通今大小便不通者是大小二
腸受客熱結聚則大小便不通此止客熱暴結非陰陽不
通流故不痺關格而直云大小便不通

遺尿候

腎與膀胱為表裏而俱主水腎氣通於陰而小便水液

之下行者也腎虛冷冷氣入胞胞虛冷不能制小便故遺尿

小便數候

腎與膀胱為表裏俱主於水腎氣通於陰此二經虛而有熱乘之熱則小便澀虛則小便數熱澀數也

下利候

腸胃虛弱為風邪冷熱之氣所乘腸虛則泄故變為利也此下利是水穀利也熱色黃冷色白

帶利候

帶利由冷熱不調大腸虛冷熱氣客於腸間熱氣乘之則變赤冷氣乘之則變白冷熱相交則赤白相雜而連帶不止名為帶利也其狀白膿如涕而有血雜亦有少血者如白膿涕而有赤脈如魚腦又名魚腦利

血利候

熱乘血入於大腸為血利也血之隨氣外行經絡內通臟腑皆無滯積若冒觸勞動生於熱熱乘血散滲入大

腸腸虛相化故血利也

陰痒候

婦人陰痒是蟲食所為三蟲九蟲在腸胃之間因臟虛蟲動作食於陰其蟲作勢微則痒重者乃痛

脫肛候

肛門大腸候也大腸虛冷其氣下衝者肛門反出亦有因產用力努偃氣衝其肛亦令反出也

陰腫候

陰腫者是虛損受風邪所為胞經虛而有風邪客之風氣乘於陰與血氣相搏令氣血否澀腠理壅閉不得泄越故令陰腫也

陰痛候

陰痛之病由胞絡傷損致臟虛受風邪而三蟲九蟲因虛氣作食陰則痛者其狀成瘡其風邪乘風氣衝擊而痛者無瘡但疼痛而已

陰瘡候

陰瘡者由三蟲九蟲動作侵食所為也諸蟲在人腸胃之間若腑臟調和血氣充實不能為害若勞傷經絡腸胃虛損則動作侵食於陰輕者或痒或痛重者生瘡也診其少陰之脈滑而數者陰中生瘡也

陰挺出下脫候

胞絡傷損子臟虛冷氣下衝則令陰挺出謂之下脫亦有因產而用力偃氣而陰下脫者診其少陰脈浮動浮則為虛動則為悸故令下脫也

陰冷候

胞絡勞傷子臟虛損風冷客之冷乘於陰故令冷也

陰中生息肉候

此由胞絡虛損冷熱不調風邪客之邪氣乘於陰搏於血氣變而生息肉也其狀如鼠乳

瘻候

此或因帶下或舉重或因產時用力損於胞門損於子臟腸下乘而成瘻

痔病候

痔病由勞傷經絡而血流滲之所成也而有五種肛邊生瘡如鼠乳出在外時出濃血者牡痔也肛邊腫生瘡而出血者牝痔也肛邊生瘡痒而復痛者為血脈痔也肛邊腫核痛發寒熱而出血者腸痔也因便而清血出者血痔也

寸白候

寸白是九蟲內之一蟲也凡九蟲在人腹內居腸胃之

間腑臟氣實則蟲不動不為人害虛者蟲便發動滋長
乃至斃人又云飲白酒以桑枝貫牛肉食生粟生魚仍
飲乳酪能變生寸白者也

陰臭候

陰臭由于臟有寒寒搏於津液蘊積氣衝於陰故變臭
也

尿血候

血性得寒則凝得熱則流散若勞傷經絡其血虛熱滲

入胞故尿血也

大便血候

勞傷經脈則生熱熱乘於血血得熱則流散滲入於大腸故大便血也

失精候

腎與膀胱合而腎藏精若勞動膀胱傷損腎氣則表裏俱虛不收制於精故失精也

乳腫候

足陽明之經胃之脈也其直者從缺盆下於乳因勞動則足腠理虛受風邪入於榮衛榮衛否澀血氣不流熱結於乳故令乳腫其結腫不散則成癰

妬乳候

此由新產後兒未能飲之及飲不泄或斷兒乳捻其乳汁不盡皆令乳汁蓄結與血氣相搏即壯熱大渴引飲牢強掣痛手不得近是也初覺便以手助捻去其汁并令傍人助啣引之不爾成瘡有濃其熱勢盛則成癰

乳癰候

腫結皮薄以澤是癰也足陽明之經脈有從缺盆下於乳者勞傷血氣其脈虛腠理虛寒客於經絡寒搏於血則血澀不通其血又歸之氣積不散故結聚成癰者癰氣不宣與血相搏則生熱熱盛乘於血血化成濃亦有因乳汁蓄結與血相搏蘊積生熱結聚而成乳癰年四十已還治之多愈年五十已上慎不當治之多死不治自當終年又懷娠發乳癰腫及體結癰此無害也兼懷

胎之癰病起陽明陽明胃之脈也主肌肉不傷臟故無害診其右手關上脈沈則為陰虛者則病乳癰乳癰久不瘥因變為癰

養生方云熱食汗出露乳傷風喜發乳腫名吹乳因喜作癰

發乳潰後候

此謂癰疽發於乳膿潰之後或虛假或疼痛或渴也凡發乳潰後出膿血多則腑臟虛燥則渴而引飲飲入腸

胃腸胃虛則變下利也

乳瘡候

此謂膚腠理虛有風濕之氣乘虛客之與血氣相搏而熱加之則生瘡也

疽發乳候

腫而皮強上如牛領之皮謂之疽也足陽明之脈有從缺盆下於乳者其脈虛則腠理開寒氣客之寒搏於血則血澀不通故結腫而氣又歸之熱氣淳盛故成疽也

熱久不散則內敗為膿也

乳結核候

足陽明之經脈有從缺盆下於乳者其經虛風冷乘之
令折於血則結腫夫腫熱則變敗血為膿冷則核不消又
重疲勞動氣而生熱亦焮烺其湯熨針石別有正方補
養宣導今附於後

養生方云踞踞以兩手從曲脚內入據地曲脚加其上
舉尻其可用行氣愈瘰癧乳痛交兩脚以兩手從曲脚

極掣舉十二通愈瘰癧乳痛也

石癰候

石癰之狀微強不甚大不赤微痛熱熱自歇是足陽明之脈有下於乳者其經虛為風寒氣客之則血澀結成癰腫而寒多熱少者則無大熱但結核如石謂之石癰發背候

五臟不調則致疽疽者腫結皮強如牛領之皮六腑不和則致癰癰者腫結薄以澤是也腑與臟為表裏其經

脈循行於身俞皆在背腑臟不調和而腠理開受於風寒折於血則結聚成腫深則為疽淺乃為癰隨寒所客之處血則否澀不通熱又加之故成癰疽發背也

改訾候

此為內癰發於脅名為改訾由邪氣聚在下管與經絡血氣相搏所生也至其變敗狀如癰疽

發乳後渴候

此謂發乳膿潰之後血氣虛竭腑臟焦燥故令渴也渴

引飲不止飲入腸胃則變為下利也

發乳下利候

此謂發乳而腸胃虛受冷則下利也大腸為金水穀之道胃為土水穀之海也金土子母而足陽明為胃之經其脈有從缺盆下於乳者因勞傷其脈虛而受風寒風寒搏血氣血否澀不通故結癰腫腫結皮薄以澤者為癰而風氣乘虛入胃則水穀糟粕變敗不結聚腸虛則泄為利金土子母俱虛故發乳而復利也又發乳渴引

飲多亦變利也

發乳久不瘥候

此謂發乳癰而有冷氣乘之故癰疽結經久不消不潰而為冷所客則濃汁出不盡而久不瘥

發乳餘核不消候

此謂發乳之後餘熱未盡而有冷氣乘之故餘核不消復遇熱蘊積為濃亦有淋瀝不瘥而變為癰也

發乳癰候

此謂因發癰瘡而濃汁未盡其瘡暴瘥則惡汁內食
後更發則成癰者也

巢氏諸病源候總論卷四十